



王文靖公集卷二十二

祭文

祭大學士大名成公文

國有元臣。鄉有耆德。降岳乘箕。為世楷式。憶公生平。  
人倫山斗。運鍾名世。皐夔為友。  
世皇在宥。秘館儲英。石渠天祿。振藻蜚聲。藻重龍門。

受業

太



倉唐孫華

武進趙鳳詔

校訂





晉推武庫。璀璨雲霞。鏗錡英獲。敬共夙夜。朱紱方來。  
黑車後戶。晉陟中臺。三典文衡。甄收英妙。茅茹彙征。  
水鏡朗照。三銓正席。休問壺宣。澄叙流品。雅擇才賢。  
熙載亮工。登庸揆路。矢心精白。以荅殊遇。濟川舟楫。  
和羹鹽梅。格天隆業。利物宏才。杜斷房謀。姚通宋直。  
蕙茲衆美。贊襄輔翼。功成不有。蟬蛻軒裳。角巾西第。  
綠野為堂。如呂釣磻。如溫居洛。巋然靈光。神彩矍鑠。  
問政考德。干旌在門。嘉言必告。惠澤黎元。公之文章。

挾天華國。寡香群彥。漱芳六籍。貫月寶焰。擲地金聲。  
瑤林蕙圃。莫與之京。公之盛德。特達孚尹。如圭如璧。  
望實清允。與物無競。飲人以和。汪々千頃。容納弘多。  
雲卧東山。鴻冥千里。蒼生屬望。冀公再起。何天不吊。  
奄忽蓋棺。豈其仙遊。駕鶴驟鸞。凋謝老成。後進安放。  
死生契濶。風流長往。驚聞哀訃。摧心疾首。設祭廟門。  
哭父執友。公與先公。契合交聯。進既同籍。歸亦同年。  
燕魏往來。時勤魚雁。贈以雜佩。比之緇獻。余隨杖履。

周旋參侍。備蒙獎誘。許為國器。曲席深談。自宵及晝。或綴鵷班。同聞鈞奏。追憶癸卯。祖帳東亭。握手岐路。告語丁寧。曾幾何時。道山遽返。芳華未歇。音徽已遠。言念舊遊。臨風淒絕。束芻絮酒。敬為公設。沙麓茫茫。德水瀾瀾。公神行天。庶其鑒茲。

祭大學士栢鄉魏公文

惟公學為儒宗。才不世出。事業輝煌。文章炳蔚。開濟兩朝。匡扶八極。名重朝堂。聲施竹帛。當代偉人。誰為儔匹。諫垣抗議。英姿勃。見事風生。披胸抒臆。國計盈胸。民生休戚。政本清濁。官方黜陟。知無不言。言無不悉。黃門十載。啟事累百。

帝曰諒哉。邦之司直。游涉中丞。型百辟。志行潔清。秉心純一。寬不網漏。嚴不毫摘。表揚節義。尊明經術。借



箸平滇。天寧地謐。辛丑之歲。昂湖颺欸。公於斯時。垂  
紳正色。乾坤定位。尊親有秩。擢秉銓衡。風清弊絕。甄  
拔寒素。振興滯屈。爰立作相。明謨諧弼。一用公恕。兩  
忘偏執。罔睚朋比。不虞訕嫉。猗歟休哉。臯夔召畢。嗚  
呼。維公生平。豈弟忠實。內外洞然。初終若一。精神未  
衰。遽辭簪紱。宸眷鑒誠。勉從所乞。樂志丘園。覃心  
翰墨。貫穿百家。沉酣六籍。語必尋源。言皆中的。息機  
冲淡。順神靜默。朝野具瞻。番々耆碩。意謂百齡。重休

累吉。還幹樞軸。贊襄密勿。吁嗟昊天。慙遺曾不。聞訃  
失聲。涕洟承睫。憶自昔年。早瞻衮舄。周旋殿廷。匪伊  
朝夕。音問久睽。中情菀結。何期一旦。幽明永隔。西望  
輜車。無由執紼。嗚呼。公之大節。行載史筆。論道微言。  
將傳金石。古人有言。詎媿三五。河嶽日星。終天不沒。  
託詞寫心。曷究髣髴。

祭大學士李文勤公文

天生名世。翊佐休昌。必將畀以敦龐純固之氣。予以  
蕃滋碩大之福。任以調元贊化之事。使之多歷年所。  
然後烝黎馮生蒙其澤。而子孫奕世受其慶。故其功  
成也不宰。體臣道之有終。其既竣也見思。頌容保之無  
疆。惟公盛德足以相配。嘉遇足以相方。蓋公閱閱魏  
高。紹常平之世業。操履親切。見孔孟於羹牆。含章以  
貞。金玉其相。甫離史局。即任巖廊。昂貴之來。不困於



資薄。特達之擢。迥異乎尋常。故予思。答  
兩朝之殊眷。斷無枝。效一德以匡襄。源九里之  
滋。無心而成河潤。宛四時之運。素鑰而鼓春陽。粵  
若臯夔稷契。亮采於廣運之帝載。上理日臻無為。而  
元氣布濩於八荒。所以明良道合。六十年之德業。為  
海內之耆俊。二十七年之丞弼。為社稷之忠良。今雖  
泰山其頽。悲九原之不作。然其勲烈。昭垂於青史者。  
殆老子所謂善壽者死而不亡。惟余之謏劣固陋。自

計生平建立。雖不敢望公百分之一。然其情意之相  
聯。臭味之相入。則自垂髫以迄白首。始終如一。而忘  
其歲月之長。蓋士大夫生同里閭。少同肄習。任同班  
列者有矣。未必其非迹合而成心知也。即成心知矣。  
又未必時值昇平。身承殊遇。而響諧調之宮商。惟余  
沒公。自初達終。同履泰交之運。共事堯舜之主。九閩  
色太平。謀謨機務。莫不相成相助。以歌叙夫虞唐。曾  
幾何時而公往矣。今則不獨聲容邈乎其不可再遘。



即病革握手之言。隱然在耳。還顧已成陳迹。而所觀者。惟哲嗣棘藥。諸孫號擗。與夫鞠燈之青熒。總帳之風涼。余對几筵。念往昔。烏能已於泣淚之淋浪。蓋生也有涯。物之大情。無可言者。獨嘆公沒而典型漸滅。後學安做。誰能以百身贖之。而起諸泉臺也乎。酌酒盈樽。看核在御。一述生死交情。舒余悲之無已。庶幾公之來嘗。

祭大學士長洲宋文恪公文

惟公毓秀穹隆。涵精震澤。瑞應斗牛。文騰奎壁。資稟瑰奇。風裁卓越。蚤賦鹿鳴。旋升杏籍。讀書中秘。講藝成均。文章道誼。炳々麟々。承恩禁近。視艸蓬瀛。青纒寵溢。蓮炬光榮。游涉少農。殫心綜理。門館無私。苞苴勿昵。擿伏發奸。令行禁止。

天子動容。綸音褒美。西臺秉憲。司寇明刑。中樞筦鑰。銓部持衡。嘉謨碩畫。悉見施行。南宮選士。尤著公明。



忱恂

帝鑒。政府登瀛。論思密勿。退食從容。象賢濟美。薛鳳  
荀龍。笏沐珂里。鬱々蔥々。三十年前。公為孝廉。郊祀  
齊譽。並轡遊燕。春風馬上。夜雨燈前。先公器重。文酒  
流連。公入詞林。余旋長篆。共事一堂。晨昏相見。羨公  
美材。南金竹箭。卜公遠到。馳驅掣電。風雲際遇。騰蹕  
青旻。昔慚問業。今獲同寅。覃思秘閣。奏對楓宸。篤棊  
交備。相期有成。嗚呼。公之度量。璞玉渾金。公之器宇。

岳峙淵渟。玉山比峻。金鏡同清。允矣君子。巖廊典型。  
何不慙遺。溘先朝露。震悼中朝。款款道路。冠劍猶存。  
音容非故。茂苑吳江。曷云能溯。熙辱公交。道義相資。  
表言讜論。時能切劘。人材凋謝。廊廟淒其。絮酒生芻。  
匪哭其私。

祭戶部尚書戴公文

猗歟司農。蔚然父執。氣比芝蘭。誼同金石。丁卯京闈。  
偕登桂籍。公先脫穎。鳴珂梧掖。謹論昌言。士林矜式。  
興朝定鼎。泰階重闢。徵聘遺賢。蒐羅岩穴。公時應召。  
彈冠魏闕。踐陟清班。迴翔卿月。講求制度。有典有則。  
叙建章程。無偏無側。

帝曰亮哉。予違汝弼。疇咨卿貳。勤求耆碩。時先文貞。  
宮詹移疾。公為抗疏。以引以翼。推賢進能。匪云私暱。



公典大農。民若是恤。酌盈劑虛。勤修職業。戶外雙藤。  
庭中掃葉。請謁不行。苞苴屏跡。朝野喁。歸公清節。  
昔與長君。叨同硯席。雪案篝燈。風簷帖括。臚傳高第。  
聲名。綽奕。次君濟美。聯翩奮翮。烏府乘駟。蘭臺載筆。  
薛風鏘。荀龍蟄。堂構無窮。箕裘罔斁。閑情高寄。  
怡神翰墨。瘦玉千竿。寒溪百尺。片楮流傳。珎同拱壁。  
秋圃春畦。匏搏蠟屐。課雨量晴。吟風弄月。惟仁斯壽。  
永綏厥德。鄉望期頤。朝思憲乞。綺里東園。蒲輪安輶。  
何弗慙遺。歛焉殂沒。嗚呼。公與先君。誼殷疇昔。熙時  
辟呬。承公顏色。知己之感。實深存歿。東望滄瀛。無由  
執紼。生芻寄哀。中情如失。靈馭雖遙。庶幾來格。



祭工部尚書朱公文

惟公恒山結秀。易水鍾英。應期迺降。叶運而生。渾金璞玉。岳峙淵淳。早在膠庠。已有令名。

聖主龍飛。巍科連掇。首擢諫垣。拾遺補闕。白簡飛霜。丹心捧日。謹論昌言。巖廊生色。忱恂洞鑒。游陟清鄉。銀臺栢府。曳紫紆金。詢謀大政。議論昌明。才情煥發。丰采增峻。忠貞直亮。總憲萬邦。揚清激濁。振紀提綱。入贊廟謨。嘉言孔彰。大法小廉。咸安典常。旋長夏



官。戎兵克詰。澄汰虛糜。申明紀律。武備聿修。郵傳整飭。海澨承平。疆隅寧謐。情深風木。請假持喪。飭粥中廬。麻衣墓旁。至行純篤。感動維桑。求忠於孝。名聞廟堂。

帝曰。欽哉。汝作司空。體國經野。鳩材聚工。山林川澤。審計泛容。書思手版。啟事宸楓。忽賦遂初。優游泉石。寄興琴樽。怡情經籍。手不停披。陳編往迹。戶罕鳴騶。庭餘落葉。時逢佳日。朋好過從。雙柑斗酒。蚤韭晚

菘。有子承歡。肅。雍。孫枝秀起。薛鳳荀龍。嗚呼。惟公為國重臣。為鄉祭酒。東山暫卧。蒼生翹首。箕尾俄歸。山頽木朽。如可贖兮。百身何有。熙泰同朝。四十餘年。晨鐘晝漏。曳履隨肩。里門相望。時異周旋。何期一旦。公先溘然。典型長謝。音容不復。零落山阿。蕭條華屋。念公疇昔。愴然在目。何以寄哀。生芻一束。



祭刑部侍郎葉文敏公文

賢人君子。天生之既不易。宜相之者厚矣。然德或浮於年。而用多不竟其位。雖號稱國禎。蔚為人瑞。至其沒。論者猶嗟悲而不能已焉。蓋深信蘊蓄之未罄。而恨新其功業之所至。如君天資之敏妙。器識之弘湛。而又加以學術之純粹。故與人必矜擇。稽古非擬議。安貧若甘食。志道如謀帥。六經百史。古今傳記。農術醫方。天書地志。莫不貫穿。間為評次。而尤大者。在闡



孔孟之微言。別朱陸之同異。世之聞人名士。聆其言。但嘆其妙。觀其行。願與其群。而莫能為之叔季。嗚呼。君之生平梗概如此。所以輿論皆美小物之克勤。而不僅謂大者之可識。憶昔己亥。君蒙召試。帝心嘉賞。求前無二。結策南宮。遂官禁秘。以及受知今上。侍紅雲於玉除。啟縹緗於金匱。筆削前代之是非。鑒定羣英之文字。疊承殊遇。洊膺重寄。檢其才學。委以政事。自此天下可以無冤民矣。而受事未幾。奄

忽傾逝。此知與不知者。莫不驚悼而嘆喟。君之勳烈。顯著乎朝廷。而隱加乎民吏。良以進講之際。或莊述典謨。切規神聖。或從容圖史。開導聰明。有特荷採納。而不得聞於外庭者。其裨益良多。所以徹瑟之晨。獨膺茶酒白金之恤。以九重深悉其忠。而悲其逝之速也。則君素所建樹者。豈止一方之受賜。惟余與君。終始一致。一日之長。寵命所使。久敬不忘。獨出予意。至君風義之清整。撰述之爾雅。尤為先文貞公稱歎。



不置。風木之痛。賴君嘉言。銘於墓隧。碩德幽光。常懸  
不墜。歎昔悲今。涕泣橫泗。嗚呼。君之名垂於國史。經  
傳於後嗣。人生如此足矣。君可以無悲。但予吊而登  
君之堂。視其椁。無新衣。其庫無餘財。親知義故。哭皆  
失聲。是澹泊之味。君以安於生前。廣潔之風。世乃興  
於身後。雖清如胡威。其有愧於君。不亦多乎。俯仰楹  
奠。中心欽企。嗚呼。樽酒既盈。穀核列脩。撫棺一慟。非  
君誰為。

祭都察院左都御史董公文

惟公衍派江都。傳家厥次。代毓鴻儒。簪纓相繼。公降  
不遲。天資現異。掉鞅文壇。聯鑣上第。玉堂視草。金  
殿譚經。恩霑珍饌。寵溢青綾。典試滇南。公明並著。事  
竣還朝。宸衷眷注。京師首善。聲教攸先。振興學校。  
端藉名賢。特簡我公。品題多士。英雋咸登。孤寒罔滯。  
帝嘉清德。峻陟綸扉。旋貳容臺。掄才棘闈。轉佐司農。  
遂總邦憲。綱紀凝然。清霜紫電。百寮知儆。廢績允登。



風生臺閣。威震京畿。

帝曰。兩江。厥惟要地。爾實重臣。俾往節制。公至之日。嚴而不苛。路無拾遺。海不揚波。吏稱其官。民安其業。年穀順成。閭閻豐殖。漕儲轉運。積弊叢姦。公為振刷。輸輓爭先。治行升聞。天書趣召。西臺再入。靖共是效。康衢暫息。解組歸田。栽花種柳。北陌南阡。會遘軍興。餼糧最急。捐貲奉公。傾家弗恤。大勳既奏。邊塞清寧。論功行賞。章服榮旌。河惠孔殷。久勞

睿慮。公往勤襄。綢繆備預。泥塗暑雨。寢食靡違。清水安流。力能刷黃。公於爾時。形神交勸。志在鞠躬。莫敢言瘁。何期一疾。竟致溘然。龍蛇躔歲。箕尾行天。遺疏馳聞。言詞愷切。

天子動容。優加贈卹。嗚呼。公之生平。正直不阿。世德象賢。英材孔多。惟公之身。以死勤事。崇德報功。典章攸備。熙服膺自昔。仰止多年。忽承華訃。能不嗟然。絮酒生芻。展敬筵側。蕪詞告哀。冒竟胸臆。



祭戶部侍郎嚴公文

申酉之歲。景運初啟。公以碩德。祥刑。擣李。慈心濟物。  
妙智解紛。仁留七縣。義感三軍。迄今武原。廟祀無改。  
朱邑庚桑。桐鄉畏壘。乃握麟符。外臺蔽省。晉秦虔廣。  
旬宣藩屏。閱閱日積。敷歷云久。遷秩奉常。卿月清潤。  
佐掌司農。會計允當。粟陳窖中。錢流地上。規條經畫。  
可襲可因。公私兩便。澆晏後身。功成遂初。幽居林壑。  
侶謝夔龍。情怡猿鶴。公才實奇。卓犖英湛。如矢釋括。



如金出範。入侍軒墀。出綏邦國。風節矯。物情矜式。  
至即赫然。去或見思。盤騎下馬。立有豐碑。公文博雅。  
班香采艷。沾溉綳芸。宗盟鉛槧。局錡機緘。兼綜衆妙。  
武庫龍門。神韻照耀。青山白雲。嘯詠多暇。嗣續風騷。  
追踪鮑謝。公視厥身。表儀群品。大呂黃鍾。聞聲思凜。  
鄉閭紳士。邦君大夫。典型耆望。景德式廬。公辨於辭。  
閭。侃。峻嚴霜肅。清瑩珠轉。築舍道謀。片言立決。  
雍容弄丸。物情剖徹。公行其德。孝友宜家。次及姻黨。

民物惠嘉。已責周乏。積而善散。緩急可倚。澤流江漢。  
文豹深山。素駒空谷。頤性凝神。誕膺遐福。象賢翼子。  
繩武多孫。水徒綿大。鍾此德門。宜侶喬松。長留俊偉。  
忽厭塵囂。乘雲箕尾。老成凋謝。興悲朝露。曾不慙遺。  
佇光天步。公及先君。同薦春闈。先君沒後。公亦長埽。  
寂寞松楸。淒其風雨。我思父友。涕泗哀苦。憶隨杖履。  
恭侍周旋。誨言獎誘。忘分忘年。曲席而談。自宵及晝。  
或綴鷓班。同聞鈞奏。懸車之後。如溫居洛。氣厚神完。



常聆矍鑠。曾幾何時。遽逐道山。聞訃驚悼。神馭無還。  
言念舊游。臨風淒絕。未芻辨香。敬為公設。楚雲茫茫。  
江水瀰瀰。公神行天。庶其鑒茲。

祭贈內閣學士張湘曉文

公起南徐。文章爾雅。理遠開閩。辭斐揚馬。鎔鑄經史。  
國工良冶。針發三傳。無能難者。專如休預。遠避三舍。  
在昔

世皇。平吳利彥。篠蕩瑤琨。錫貢江甸。公文一出。衆美  
畢見。既冠秋闈。遂開春宴。紙貴黃圖。名播赤縣。乃官  
大行。持節閩魯。晉典銓衡。彙征公溥。六計獎吏。廣善  
首取。清瑩金鏡。執堅玉斧。茂實英聲。裴王接武。中原



麟鳳。資待搜羅。藉才文宿。臨照荆河。士風丕變。寒俊  
巍峩。學宮定祀。里巷絃歌。菁莪撲棧。俊造增多。公廉  
而明。輿論無兩。奏最三臺。恩膺懋賞。輝煌卿月。滂  
升金掌。爰賦遂初。園林願養。羔雁頻來。冥鴻獨往。凡  
此勳名。出入駸歷。程豹一班。滄海涓滴。為公緒餘。為  
人嘉績。六月鵬息。未盡搏擊。大業弘傳。後賢啟迪。顯  
允宗伯。砥柱擎霄。球圖器用。台鼎丰標。金昆玉友。通  
籍中朝。孰親刀尺。琢此瓊瑤。靈椿鬱然。庭誥於昭。盛

時偉人。物望歸美。歸若靈光。照耀江水。藝林蕙圃。尸  
祝畏壘。白雲留駕。蒼生待起。拜前拜後。是父是子。黑  
頭納節。黃髮釣蟠。高山流水。巖詠川觀。松喬可侶。耄  
耄何難。倏歎乘箕。庭陞玉棺。萬事長已。總帳風寒。昔  
我文貞。伐木興咏。公來南州。席珍待聘。傾蓋定交。折  
節修敬。左圖右史。參互攷証。合志同方。希學賢聖。惟  
余不敏。垂蠅借彩。尾驥南宮。歲丁在亥。余少公年。十  
有一載。肩隨弟視。垂老不改。山苗澗松。歲寒青靄。獲



交宗伯。又後十年。一日之長。糠粃在前。芸堂視草。宮  
燭輝蓮。紀群抗手。膺融比肩。苔岑膠漆。躡跡古先。自  
公得老。揚幽地隔。暫來鱗羽。喜滿大宅。時對玉樹。挹  
想標格。聞公清健。善飯勝昔。示以家書。蠅頭細畫。公  
之知我。勝我自知。我今悲公。寧知我悲。寢門一慟。清  
淚交垂。拊棺執紼。慚負心期。千里赴吊。彼何人斯。迨  
美述功。思弄柔翰。家乘先我。彪炳璀璨。語真事核。一  
辭莫贊。淚痕明滅。墳映几案。閣筆驚視。忽成愧歎。爰

雞絮酒。遙供江步。臨風灑泣。抒寫情懷。公神行天。或  
來惠顧。鑒此誠信。神其不吐。無盡者心。言之不足。



王文靖公集卷二十三

受業

高安徐日昫

南靖張福衍

校訂

祭文

祭兵部侍郎孫公文

惟公營丘毓秀。歷下鍾英。應期始降。叶運而生。時岳

渟淵。精鏐粹玉。早薦賢書。譽騰尊宿。

世皇乙未。闢館儲賢。妙選庶常。公實預焉。改授諫垣。



拾遺補闕。知無不言。言無不切。衡文三楚。朗鑑甄收。  
梗楠杞梓。悉拔其尤。僉謂是科。得人最盛。名公鉅卿。  
茹連彙進。帝懷忠鯁。卿月升華。游佐夏官。謨謀孔嘉。歲在丑寅。  
滇南告變。閩粵之鯨鯢相煽。殫心區畫。夙夜靡寧。三  
逆旋銷。四海永清。功成不居。予告歸里。寄興琴尊。娛  
情圖史。鑾輿南幸。公迎道旁。帝識舊臣。羨其康彊。戊辰之春。重來鳳闕。精彩煥然。

無異疇昔。公德彌劬。公神獨完。壽考康寧。惟公克全。  
有子英<sub>上</sub>。聯登桂籍。諸孫濟<sub>上</sub>。蘭芽競茁。比於岱宗。  
宇內翹首。詎意飄然。騎箕入斗。熙媿無似。同朝有年。  
中樞聯袂。朝夕周旋。翼展一籌。仰佐宸斷。芻蕘之  
言。賴公文贊。自公之歸。感歎離羣。思公不見。搔首停  
雲。每荷歲時。錫以卯翰。展誦回環。如覲公面。仲君昨  
至。詢公起居。聞公違豫。戴星而趨。無幾何時。遽聞公  
訃。人之云亡。典型曷覩。蕭條華屋。零落山阿。風悲泉







帝鑒忱恂。起佐司寇。春明再入。公名益懋。有懷高蹈。  
翩然遂初。抗章得請。言旋舊廬。令子象賢。容臺接武。  
亦越文孫。孰林翹楚。我公怡然。高卧東山。飲食燕衍。  
黃髮朱顏。子子干旌。過門必式。樂善好施。鄉人戴德。  
壽考維祺。保艾爾後。人所艷羨。百難一覩。繫惟我公。  
得全全昌。罄無不宜。純嘏有常。名德升聞。方期憲乞。  
三老五更。蒲輪束帛。天不慈遺。木壞山頽。人之云亡。  
亦孔之哀。憶昔先公。同公廷對。西清並席。金華聯袂。

暇日過從。博酒論文。襟同白雪。誼薄層雲。熙依左右。  
撰侍杖履。備蒙獎誘。比於猶子。糠粃媿前。公不我棄。  
頻奉教言。誠懇周至。公雖家居。如溫在洛。詢公起居。  
頗聞矍鑠。忽忽十年。道山遽返。音徽如存。神馭已遠。  
憶昔丙申。方葺草堂。有鶴來止。縞衣黑裳。軒車適臨。  
頽之而笑。作記壁間。衡宇增耀。俯仰如昨。能不凄然。  
公今安歸。神行於天。絮酒生芻。冀展微臆。雲車風馬。  
庶幾來格。



祭治理曆法南敦伯文

惟君離竒磊落之才。探賾窮幽之智。其學善於以人  
合天。其術精於利用制器。其居心也。如春雲秋月。而  
朗麗夫襟懷。其肆應也。如紫電青霜。而宏通夫名義。  
方其生於西土。從師教肄。敬業樂群。博聞廣記。英  
秀上。冠冕倫類。有迥出之清標。有行遠之宏致。故能  
觀澄海之無波。慕皇風之遠被。延頸舉踵。望斗以  
傾心。駿奔稽首。重譯而來至。由粵入京。奏請自試。一



吐胸中之奇。具言測驗之事。於  
聖朝之用人。妙隨宜而位置。叩其中藏素蘊。而知有  
異衆之能。俾領馮相保章。而得有效用之地。於時君  
稟先程之規美。運體知之巧思。觀文察變。以追合乎  
日月星辰。前民授事。則精辨夫作訛成易。洞鑒毫芒。  
殫極勞動。旁及百物。制作精緻。衝城威敵。鑄金而助  
火攻。激流成雨。揉木而成水嬉。鐘自鳴而宵晝分明。  
鏡窺遠而千里可視。足令工倕讓巧。公私攸利。群服

其妙。莫敢軒輊。余嘗望君交戟之間。觀其丰姿瑰異。  
發言恂謹。視躬淳懿。知其仲叔義和。班聯卿貳。實由  
奉職之公勤。非獨技藝之宏肆。益信 國家眷顧遠  
臣。施恩不次。俾君展布才猷。寵榮莫二。足垂史冊之  
休光。以作彙征之鼓吹。今雖鶴馭瑤京。老成淪陸。然  
身沒而名常存。榮哀而典具備。則君當含笑九原。脫  
然無累。但顧念夫平生。歎芳薇之誰嗣。臨風舉觴。能  
無涕淚。肴核列陳。椒馨升積。君其鑒此悃誠。



祭侍讀施愚山文

在昔宛陵。梅聖俞氏。長於風詩。清麗而旨。又造平淡。  
閑肆深遠。間出怪巧。雕鏤琰琬。君生其鄉。如其善鳴。  
震越渾錙。衆聽以驚。作為文章。乃出其右。清湛容與。  
松風澗溜。近規遠取。以力自勝。深入閭與。而無門徑。  
迨登仕籍。勤直清方。秋官持法。比跡于張。兩司文衡。  
屢監州郡。私書不發。廣明有聞。順治六年。君來都下。  
名前羣英。射策金馬。遂謁先公。束脩請益。予得與君。



定交茲夕。同侍函丈。朝暮切磋。講道析疑。裨助孔多。  
三十餘年。情好無間。不以外補。濶踈遠宦。己未召試。  
木天誕登。凜。史筆。遷馬一燈。退食過予。話舊相囑。  
貌雖清羸。神猶矍鑠。曾幾何時。忽聞告哀。悲慟疾呼。  
五管為摧。風雅式微。正始弗還。優孟少陵。搢屨義山。  
衆厭思返。苦於極重。遂有黜者。轉而之宋。門墻雖改。  
傭賃如故。不有哲匠。孰起沉痾。至於吏事。以進相高。  
爭巧鬪捷。森張蝟毛。君行二途。別調自背。或尋清舉。

或尚冲退。特達之知。遭逢明聖。所惜少晚。厥施不  
竟。文苑循吏。君自足傳。豈必華臚。而後重焉。猶憶燕  
閒。詢君家世。自痛少孤。叔父育惠。嬉荒廢業。杖不聽  
入。君奮請改。相持以泣。君求其志。仕獎其廉。我思古  
人。薄俗鍼砭。如君行業。亦何可得。永暮不忘。有過能  
克。昔。堯臣。學於昌言。仲父猶子。至性篤恩。今君所遭。  
方古無異。况復詩名。焜煌大地。浴。奇湖翼。敬亭。  
嘉問不減。緇帙常青。我行蕪辭。有一求可。抗揚盛德。



喻若燭火。豆籩肴核。瓠壺清醴。君其來乎。鑒歆享此。

祭詹事沈文恪公文

往歲壬辰。

世皇策士。俊乂彙征。鵬騫鵠起。君尤秀上。宏辭雲霧。  
高第異等。清映銀艾。玉堂視艸。芸署蜚聲。奮庸亮采。  
天祿承明。子長龍門。元凱武庫。金版玉函。名實交鶩。  
尋轉外臺。政孚人悅。游必有餘。處高自潔。慶雲汴水。  
化雨成臯。公廣馳譽。琴鶴為操。畿輔萬家。惠敷棠蔭。  
銜車迨入。升華紫禁。秉鐸成均。造登名彥。鼓吹休明。



輝煌經傳。六館寡芳。三舍振藻。棧撲菁莪。蔚為國寶。  
晉階端尹。任重青蘭。名儒碩德。園綺騰輝。彛鼎琬琰。  
昭明高朗。倏驚朝露。遺世長往。君之文學。雄視藝苑。  
含咀英華。探測元本。君之政事。卓冠同朝。敏比剡犀。  
練若承蜩。德器瑰偉。丰姿清劭。柱礎明堂。珪璋廊廟。  
言物行恒。式茲後來。榮名群仰。雲日昭回。旁逮六書。  
窮極容勢。金薤銀鈞。碑版絢麗。天寵褒嘉。人莫與  
比。卿月台星。待君屈指。謂宜壽考。登陟要津。乘箕翮

然。忽反其真。位亞三事。年不耄耋。齋志長終。聞者哽  
咽。嗚呼。憶昔與君論心京陌。一日之長。交堅金石。昔  
我先公。幽宮有誌。君念世好。法書寵被。鳳翥鸞迴。墨  
光斐亶。篤契深知。靡間終始。遺像儼若。屋宇如昔。萬  
事永畢。一身猶客。憑棺視纊。淚落聲吞。言之不忍。况  
甚於言。歸櫬南州。靈輶遄發。黯々江雲。迢々吳月。風  
流邈矣。山川間之。生芻一束。侑以哀辭。君神洋洋。庶  
其來下。享我醴烝。暫駐風馬。



祭副都御史徐荆山文

人生斯世。喻如露電。歲月易盡。令名足羨。惟茲三立。  
久乃愈馨。顯允中丞。不媿斯稱。嗚呼。惟公荆玉澄流。  
芙蓉凝秀。大江之南。人傑篤祐。果毅高明。剛方正直。  
南宮射策。金闈通籍。分司雲署。掌禁秋曹。含香著譽。  
題柱名高。民自不寃。祥刑長國。易兆來章。書云邁德。  
尋遷外臺。敬歷藩服。隼旟過飛。熊車馳逐。政務忠飭。  
法紀肅張。惠流汾晉。棠蔭代疆。游陟清鄉。材猷益展。



禮肅寅<sup>清</sup>銀臺冠冕。烏府執法。振率百僚。神羊當陛。威  
鳳騰霄。將父歸<sup>曰</sup>嘉慶珂里。風木忽悲。途驚齧指。因奉  
國恤。藥棘來京。修歎乘箕。神歸蓬瀛。公之文學。雄視  
藝苑。含咀英華。探測元本。公之政事。卓冠同朝。敏比  
剗犀。練若承蜩。德器瑰瑋。鴻鉅清劭。柱礎明堂。珪璋  
廊廟。言物行恒。式茲後來。榮名群仰。雲漢昭回。謂宜  
壽考。儀表人間。忽反真宅。棲神道山。如公之才。年不  
老耄。齋志長終。聞訃哽咽。悠々蒼天。與善云何。凋謝  
老成。薤露悲歌。嗚呼。憶昔同朝。鷓鴣相望。屈指首推  
清姿雅量。期公康濟。祝公顯融。曾幾何時。飛絮飄蓬。  
方思請問。握手道故。遽聞訃音。怛然驚呼。風流邈矣。  
山川間之。生芻一束。侑以哀辭。君神洋洋。庶其來下。  
享我肴烝。暫駐風馬。



祭侍御家農山文

積水天池。地靈秀結。篤生英俊。蔚為人傑。維公之先。  
太原貴胄。經術傳家。奕葉淵茂。教傳至公。名德益上。  
素履清高。文采宏放。持衡藝苑。領袖辭英。隋珠照夜。  
和璧連城。既薦賢書。遂登上第。宋艷班香。芬馥當世。  
解褐太行。校士京闈。鳳麟畢羅。珠玉交輝。翼、京儲。  
國計攸重。雀鼠耗之。跳梁恣縱。孰能釐剔。金舉公才。  
繡衣持斧。晉秩西臺。身範清嚴。心計開敏。銘比干將。



健如秋隼。宿猾大奸。聞風落胆。京坻露積。侵漁莫敢。  
勳名始煥。公已倦遊。五湖烟水。一葉扁舟。川泳巖居。  
抗懷高寄。細註丹經。頻申莊義。絳雲天際。卷舒自然。  
幽棲谷裏。履道坊前。庭誥義方。教成式穀。階砌芝蘭。  
令聞清淑。三珠競秀。一鷲凌霄。校書芸閣。秉憲中朝。  
公輔之望。隆於台鼎。是父是子。趾美瓌題。紫泥鸞勅。  
朱芾貂璫。後先輝映。歌咏龍光。百年樹德。既實既秀。  
永錫難老。樂此錦晝。憶昔京華。肩隨敦賞。公弟視我。  
心知無兩。迨公請急。旌旆斯東。鸞噓云遠。魚素時通。  
癸丑之春。鳳飛惟季。爰及伯仲。文場拔幟。高軒時過。  
密坐茅齋。詢公福履。以慰離懷。喜公踰耆。眠食安善。  
不廢登臨。時親書卷。公年昨歲。如呂釣磻。華堂燕喜。  
競賦琅玕。余寄小詩。以侑酌者。何期一旦。聽樂釣野。  
音容宛在。已隔明幽。風悲宰木。雲暗荒丘。爰雞絮酒。  
遙供江潭。堂華零落。悲悼難堪。



祭御史郝鈍齋文

憶自丙戌。京闈策士。連茹而升。如雲俊乂。惟余與公。情若兄弟。同榜同師。重以同志。顯允司農。巋然父執。迨於恭定。叨隨釋褐。里接枌榆。情踰膠漆。通門之交。累世如一。公以高才。屢躡南宮。委蛇謁選。百里花封。操刀善割。製能工。聲高卓茂。名騰魯恭。治行孔彰。公車交薦。入拜蘭臺。激揚風憲。驄馬行畿。皂囊上殿。知無不言。言無不善。



帝懷直諫。擢掌臺端。盈廷集議。侃侃而談。深裨國計。  
暢悉民艱。風生獅牙。品貴鸞鷟。令子英英。克傳家學。  
蓋榜聯登。瀛洲特擢。器識澄泓。文章淵博。諸昆濟美。  
鳳毛麟角。箕裘克紹。公心泰然。奉身而歸。抗章引年。  
優游田里。嘯傲林泉。巖觀川泳。月下花前。視聽不衰。  
精神逾旺。七十之年。有如少壯。令子泛遊。屢詢近狀。  
聞公彊食。知公無恙。京師咫尺。冀公復來。清齋淪茗。  
別墅傳杯。俄聞木壞。遽嘆山頽。人之云亡。痛惜肝摧。

憶與公文。五十餘載。弱冠相知。白首無改。恭承訃音。  
使我心痛。雲暗松蘿。霜埋蘭茝。公神行天。箕尾之旁。  
何以酌公。炙雞絮漿。瞻叩几筵。中心盡傷。庶其來格。  
鸞旗鏘鏘。



祭學使何函齋文

丁亥之歲。春闈載啟。公時獲雋。余陪驥尾。公初謁選。司李閩中。海氛未靖。叱馭而從。錯節盤根。飲冰茹蘖。招徠綏懷。吏<sup>民</sup>感悅。攝篆會城。適會寇警。折衝贊畫。閭閻安枕。鋒車內召。含香禮曹。寅清風夜。克著賢勞。旋以踐更。偶罹註誤。鑄秩左遷。公不為迂。浮沉京師。垂十餘年。庭惟落葉。坐只青毡。同榜交遊。類多通顯。為公稱屈。惜公淹蹇。公頽怡然。不以屑意。詩酒過從。淋



漓滿志。循資歷序。還入容臺。重來舊雨。再熟寒灰。僉  
憲西江。搃持文柄。肅若秋霜。明如朗鏡。鸞湖白鹿。書  
院弘開。士習還古。文風起衰。事竣言歸。里門需次。蠟  
屐春郊。籃輿別墅。象賢濟美。實振家聲。揚鑿北闕。視  
草西清。計部升華。才猷敏練。堂司交譽。南金竹箭。季  
也高才。名齊軾轍。秋風鶚薦。行博鵬翼。緒緒得人。公  
心式慰。樂志林泉。優優遊晚歲。巖觀川泳。蔗境彌甘。  
康疆壽考。名德兼完。何意溘然。忽先朝露。山川之隔。  
末由趨赴。緬懷同譜。聚散升沉。五十年来。落々晨星。  
聞公之訃。感歎何極。黃公之壚。山陽之笛。絮酒盈尊。  
生芻一束。公靈不遐。庶聞余哭。



祭提督楊元凱文

天佑昌期。篤生熊虎。為時爪牙。奔走禦侮。繪圖麟閣。  
功烈炳焉。山河帶礪。奕世稱賢。何不慙遺。倏然摧沒。  
感念生平。中情於邑。顯允揚公。河岳鍾祥。星精毓秀。  
名重寰中。望騰朝右。金貂鵲印。玉劍龍媒。神勇天與。  
偉畧弘恢。紫電發機。青萍出匣。雄入九軍。射穿七札。  
以才推擇。晉土司兵。受知蓮幕。功懋遷鶯。乃自宣雲。  
移軍東粵。中晉新安。禁制豕突。蹶張跳盪。材武無雙。



揚廷師錫。東西江。旌旗所指。無不讐服。市肆宴然。左  
飡右粥。嶺海初歸。地餘伏莽。公往戡定。易如反掌。鯨  
鯢既剪。開釋無間。喜為酬替。老少歡呼。由粵入閩。濱海  
千里。服其威信。閩閩高起。宮階寵秩。以獎忠勤。緹幢  
羽葆。盡護諸軍。洪都大郡。京口巖疆。兼持玉節。屹固  
金湯。賜履齊封。八年兩歷。分鎮設防。休有成績。藉才  
容畜。玉帳復南。力鋤閩悍。惠洽江潭。赤嶺烏嶼。賊黨  
盤結。出奇制勝。覆其巢穴。保障榕城。人安枕席。旋師

雲間。香凝畫戟。結髮從戎。身經百戰。勲載旂常。名垂  
史傳。吳門晚歲。運際昇平。輕裘緩帶。隱若長城。立心  
公清。兵民一視。營屯騰飽。閭閻樂利。甲巳之年。

翠華時邁。公迎境上。稽首虎拜。教蒙錫賚。獎勞異恩。  
天章昭回。寵示子孫。與昔會朝。黃金廐馬。後先輝映。  
無與等者。塔廷蘭玉。濟、多才。將軍樹下。旌節花開。  
名遂功成。御風先去。攄忠不怠。口占遺疏。榮哀之典。  
寵被成勞。司空相地。大官饋牢。螭首龜趺。鐫述盛德。



照耀松楸。昭示無極。肴核列陳。醇酎盈卮。俯仰靈几。有涕漣洏。為國惜才。匪以私告。神其鑒茲。噉此羹芼。

祭甯西巖文

生死相尋。固人物所恒有。哀樂相感。亦情事之必然。惟所遭之不幸。則尤足以發人之深悲。而致恨於無窮。所以生為可樂。死為可哀。雖人情所同。莫不皆然。而俯仰今昔。於君之沒。尤覺人世之可樂者少。而可哀者多也。憶君早歲。績承家學。策名賢書之時。年伯侍御先生。方以昌言正色。立於朝。為君之父。而君又材業宏茂。而聲問斐如。年志壯強。而風采肆映。其視



拾取青紫。若在旦暮。親黨歆羨。皆謂為宜。蓋駸駸乎  
榮名茂實之將至也。乃不幸高才多窮。丁厄陽九。中  
更大故。風木興悲。君不勝搖落之歎。始勉就橫經之  
席。以求祿。荏苒十年。一遷學舍。銜魚無兆。集鵬俄聞。  
豈不悲哉。客歲之冬。君以齋捧來都。過余家省女。余  
見君年將及耆。而飲食康強如故。於時積雪當軒。素  
柯傳響。雅集飛觴。間舉平生笑言。以相歡樂。追思前  
境。倏忽今時。蓋節序無幾。而生死離合之遷變。不可

究詰矣。嗚呼。物化之遷訛。十常八九。不足怪也。然宇  
宙亦大笑。而君直以身當之。又何堪也。是月君令子  
來京。兒克善聞君病革。以身任官守。不能適往。遣人  
星夜相隨。參候。不意發幣之日。即君徹瑟之辰。至則  
丹旒飛揚。素帷閨寂。嫂及諸孤。哀號擗踊。千秋大業。  
戢身一棺。此在行路之人聞之。當為隕涕。况於身為  
姻戚朋好者乎。又况於余與君。五十載年誼世好。君  
女歸余家。余子為君壻。情義最深者乎。嗚呼。昔人於



朋友之沒。或感夢臨喪。或千里往哭。其高風遠矣。今  
京師距上谷。不過十舍。而余父子皆以繫官在朝。雖  
心往神馳。而哭不望。惟慟不撫棺。其中心之恨。豈有  
涯哉。

王文靖公集卷二十四

祭文

祭述撫閣梅公文

惟公之德。東箭南金。惟公之度。岳峙淵渟。人或委蛇。  
公以正直。人或矜持。公以坦率。皎如冰雪。潔若芝蘭。  
同心托好。三十餘年。不謂今茲。幽明永隔。聞公訃音。

受業

崑山葉

淳

校訂

廬江宋元徵



失聲而泣。溯公先世。上谷名家。洋河孕秀。獨石鍾華。  
慶集於公。生而奇穎。桂苑擐香。花封製錦。吏驚精敏。  
民誦仁慈。循績升聞。含香赤墀。改授西臺。激揚風憲。  
駉馬繡衣。肅清畿甸。

帝懷忠亮。內擢清卿。鳴珂上殿。扈蹕南行。夙夜在公。  
勤勞罔懈。用加特擢。以風有位。爰從京兆。出撫中州。  
高牙大纛。建隼鳴騶。公感殊恩。乃心精白。勤求民隱。  
弘宣上德。寬而有紀。嚴而不苛。仁心仁政。聞於兩河。

帝鑒成績。試以險阻。維此黔西。苗民雜處。深林叢箐。  
瘴雨蠻烟。人為公惜。公心泰然。熊車初臨。殫力綏輯。  
導以厚生。綏以文德。田疇加闢。絃誦相聞。宵無警柝。  
戶有鳴琴。爰疏於朝。請增解額。推及直省。悉沾公澤。  
處黔五載。公心最勞。褰帷陟嶽。露冕行郊。案有圖書。  
厨惟杞菊。屬吏欽承。苗蠻悅服。用俾  
聖德。覃被遐荒。殊方親譯。異域梯航。巖廊柱石。蒼生  
霖雨。台衡之間。想望綦履。何期一旦。去而乘箕。飄然



委蛻。與世長辭。使者來都。得公遺翰。展誦未終。淚落如綫。朋友之誼。重以婚姻。情懷閔切。何待丁寧。余子公壻。余女公媳。追忘撫存。有如皦日。公言諄。未諒余心。謹以茲語。告公之靈。公以賢勞。歿於王事。封疆之臣。恩卹有例。所悲丹旆。萬里歸來。清霄鶴唳。絕壁猿哀。不腆之奠。預展胸臆。風馬雲車。庶幾歆格。

祭內閣學士顧山容文

嗟乎。孰謂公之年壽。而遽止於斯也耶。公孝弟之行。根於天性。與人交。無少長貴賤。退然若不克勝。生平于行己事。上諸大節。不激不隨。動合矩度。以故士無識與不識。皆推公為鉅人長德。謂公之功名事業。自此銘鼎鐘。而垂竹帛。歷年彌永。而孰意竟止于斯也。公家自太翁逢伯先生。占籍京師。登甲午賢書。出宰劇邑。以博學宏詞徵。于諸子有家之書。無不通曉。公



以壬子舉京兆鄉試。癸丑成進士。選翰林院庶吉士。與余相見。執鄉後進之禮甚恭。蓋溫乎有德之君子也。讀書守道。有聲館閣垂三十年。游歷坊局。陟宮詹學士。侍

天子講幄。備顧問。余承乏綸扉。與公朝夕論思。相得歡甚。余有女未字。與公仲子寧緯。年齒相若。遂訂絲蘿之契。余築甥館于敝居之側。俾就婚讀書其間。蓋兩姓百年之好。未嘗不因素交而愈篤也。公是時。

具慶在堂。太翁素康強無疾。而太夫人以庚辰夏罹變。余唁公苦廬之次。公毀瘠備禮。握手悲泣。哀動左右。公歸。余送公廣渠門外。揮涕成別。方謂公年僅踰五十。精力未艾。自嘆衰遲鈍拙。倘天假之歲。公後服闋還朝。游登揆席。經邦論道之暇。斜川親戚情話。從容。亦人生之至樂。詎意分手一載。余嬰末疾。至今未愈。而公則奄然長棄人世矣。倉皇一別。遂成永訣。能不悲哉。今年秋。余瘳苦痔困卧。不克與京兆試。公



家書慰諭。以身為重。功名為輕。又屢以平安紓此帖之望。至十月九日。而公病見告。乃力疾兼程南歸。越數日而公訃音嗣至。計爾時當跋涉淮揚道上。梁山風雨。昔人所悲。公在九原。諒亦凄然欲絕耳。弱息愚稚。未嫻禮教。聞訃後。設位朝夕哭奠。菊樹吳雲。不即能星奔以盡婦職。此尤余之所歎歎而心痛者也。所可慰者。長君已登賢書。才名噪于吳會。而余婿文行脩潔。一時有元方季方之目。繩之接武。紹公未竟之緒。

而佐高堂含飴之樂者。于是乎在。公其無以塵世為戚也。



祭家端士文

具區之濱。婁江之滸。山蟠水結。英賢接武。惟公之先。  
綸扉衍慶。簪笏相承。軒裾華盛。緬懷文肅。相業巍然。  
建儲定策。炳燿青編。哲嗣紹聞。鳳池濟美。文章經術。  
韋平齊軌。暨於奉常。克績厥緒。子姓駢蕃。寢昌寢熾。  
光前啟後。實惟我公。桂宮杏苑。振翮搏風。憶在乙未。  
公成進士。釋褐南歸。寧親養志。西田丘壑。舊業平泉。  
承歡膝下。奉膳堂前。百頃風潭。千章夏木。興托煙雲。情



游筆墨。鈞筒茶具。白舫青簾。烏衣扶持。望若神仙。難  
弟聯翩。繼公而起。瓌瑒等譽。機雲並美。翱翔雲路。踐  
陟清華。龍墀振履。鳳彩宣葩。公懷逾逸。永遂初衣。覃  
心式穀。說禮敦詩。猗歎長君。南宮高第。製錦花封。鳴  
珂楓陛。仲方弱冠。蚤薦賢書。才華班馬。詞賦徐庾。慶  
集一門。孫枝濟。修竹碧梧。瑤環瑜珥。鹿鳴新唱。雁  
塔看題。芝蘭玉樹。並在庭墀。公以家居。備膺諸福。樂  
善好施。惠加宗族。春郊秋社。杖履逍遙。筍輿蠟屐。酒

挽詩。歌得全全。昌宜臻純。嘏何意溘然。歸真瑤圃。憶  
公風度。朗如玉山。溯公德性。靜若澄淵。孝友讓和。朝  
野欽羨。生順沒寧。詎存遺憾。與公先。系同太原。蘭  
荃世講。隸萼情聯。南北雖殊。教聞不隔。塞雁江魚。歲  
時消息。令弟同朝。雅荷相於。再從給諫。頻知起居。接  
羽攀鱗。連枝附葉。忽承遠訃。涕淚沾臆。誄詞不多。聊  
以告哀。雲車風馬。公其惠來。



祭同學張顯侯文

昔人論交。所貴知己。無間顯晦。無間生死。道義相成。金石可擬。惟余與兄。累世桑梓。丁卯之秋。京闈策士。贈君高薦。先公附尾。合志同方。周規折矩。贈君早世。諸孤稚齒。先公奔赴。感傷不已。言念金蘭。誼無可諉。申以婚姻。壻而兼子。兄之長嫂。為余仲姊。余有季妹。為兄弟姒。通家骨肉。莫遠其適。余時垂髫。與兄最昵。見不踰旬。談必移晷。兄歌采芹。才華斐亶。博古通今。



經下緯史。淹貫九流。汎濫有氏。下筆千言。洋洋纒纒。  
老生宿儒。望風披靡。學使擊節。名卿倒屣。既薦賢書。  
英聲卓偉。唾手雲霄。芥拾金紫。屢困公車。珠投璧抵。  
兄乃浩然。棄若塵滓。白鞵青鞵。吳山越水。曉懷靈境。  
依棲槁李。法喜周旋。精蘆憇止。妙探微諦。曾發宗旨。  
習靜觀空。究徹本始。松楸有懷。還歸故里。鄉音未改。  
鬢髮爾。計兄之行。六徂寒暑。爰掃我榻。爰拂我几。  
延兄來家。我齋兄處。于時言。于時語。二十餘年。

直道相砥。兄性高曠。略無塊磊。食惟充腹。衣取蔽體。  
捉襟捫蝨。納絢見趾。人或訝兄。不衫不履。詎識心交。  
惟吾與汝。比年以來。怪兄微醜。年衰氣虛。參苓可弭。  
詎期秋暮。纏綿牀第。余往候兄。絕無痛痛。異兄勿藥。  
旦夕以企。曾未決辰。溘然遐舉。訃音初聞。涕下如雨。  
憶兄議論。如弦激矢。托揚時事。動中肯綮。憶兄襟懷。  
如月印渚。光明洞達。冷然澈底。憶兄志操。屹立不倚。  
羶途倖竇。不陟階祀。憶兄家庭。肅雖有紀。中外宗親。



是依是倚。為鄉喬躬。為國園綺。齒德歸然。今茲已矣。  
賴有賢嗣。伯最敬祇。仲君鴻邁。季君鵲起。慰兄九原。  
庶幾在此。顧予離索。孰助為理。音容乍隔。想像頭徒。  
辨香蔬羹。侑茲燕誅。靈子不昧。降而鑒只。

祭內弟董翊平文

人生百年。疇為金石。升沉聚散。歛若駒隙。惟茲親故。  
誼同休戚。忽聞遐棄。能無痛惜。嗟余與君。義鑒之好。  
憶余初婚。君離襁褓。時來視姊。媚々清妓。鏡臺盥柳。  
牀頭梨棗。迨君長成。恂々雅飭。謹言慎行。舉措無失。  
余謂象賢。克繩世業。啟後承先。恃此一息。余居京師。  
君去淮陰。時來問訊。握手談心。知君受室。并曰安寧。  
稍營南畝。足繼粢盛。何期丙寅。君姊先遊。君來慰余。



歛歛流涕。甥見舅來。牽衣繞袂。渭陽之情。悲感兼至。  
淹留未久。尋返故廬。歲時伏腊。雁字鱗書。頗聞平善。  
偕時起居。晚菘春韭。畦稻江魚。每望趣裝。願余京師。  
燈下聽歌。花前酌醴。歡咲樽壘。從容杖履。猶慮哀年。  
相見無幾。詎意初冬。忽傳凶問。驚悼失聲。且疑且信。  
數月以前。未聞君病。不謂奄忽。蘭摧玉墜。嗚呼。君在  
淮南。實同羈旅。婚姻之故。爰居爰處。遺孤尚幼。誰相  
嗷煦。孀嫠在室。誰相告語。余子君甥。念舅如母。愴聞  
君訃。痛心疾首。願言陳力。經紀君後。銜哀致詞。君其  
知否。嗚呼。淮流浩渺。吳樹淒迷。莫不憑几。哭不披帷。  
生芻一束。椒酒盈卮。臨風遙誄。有涕漣洏。



祭衍聖公祖母陶太君文

書稱滄泖。易首坤乾。承家開國。母德攸先。洪惟太君。育質北平。沅芬東晉。閱閱蟬聯。宗支鼎盛。鍾祥積慶。篤生太君。夢徵尺璧。授自神人。于歸太傅。克主蘋蘩。遵豆靜嘉。式禮莫愆。東土存饑。流移載道。出粟賑糜。民歌再造。冠氛告警。邑人震驚。脫簪儲備。維桑以寧。滄海庚移。鐘簷無恙。翟服頻加。鸞書屢降。聿傳太保。克稱敬承。朝祭必恭。母訓是遵。文孫嗣服。方當稚齒。



鞠育維勤。保護靡已。歲時入覲。太君必偕。燕齊千里。抱持往來。

聖主隆儒。禮殷晝接。湛露蓼蕭。儀文稠疊。維時少師。胚胎前光。動止食息。悉稟義方。歲當甲子。

鸞輅東巡。躬臨闕里。瞻仰軒楹。車服交陳。禮器森列。

子姓雍。威儀秩。

帝稔母賢。親灑。

宸翰節並松筠。日星巍煥。殊榮異數。曠代遭逢。光生。

洙泗。寵溢鐘鏞。暨予弱息。奉帚高門。蒲質早凋。長隔。

慈恩。憶於前歲。自魯歸覲。備述德音。累詞莫竟。猗歟。

太君。恩錫兩朝。澤綿四世。六十餘年。歷更勞勩。經營。

婚宦。父子孫曾。輯和宗族。旁逮婣朋。馭下不苟。慈而。

有體。家政躬親。儉必合禮。國推壽母。里號女宗。恩榮。

備至。尊養兼隆。方冀百年。純禧永集。天不憇遺。倏焉。

徂歿。緬自去秋。愴聞哀訃。薄奠遙將。心馳緹幕。日月。

云邁。寒暑一週。蜃車黼翣。將迈山陬。熙誼泰婚。姻禮。



當執紼。猥因職守。山川云隔。再陳蕪誅。佐以溪毛。臨  
風申酌。中心鬱陶。霜露淒清。雲山岑寂。靈燕長存。庶  
幾來格。

祭靖逆侯張又南母太夫人文

猗歟太君。雍涼世胄。節鉞名楨。蘭心蕙性。說禮敦詩。

鳳占克叶。曰嬪清河。式禮無愆。嘉言孔多。惟襄壯公。

天姿英邁。受命師中。宣威閭外。功銘帶礪。績茂河山。

實惟太君。贊助行間。賜第神京。承恩禁掖。文綺頻頒。

上尊屢錫。教子義方。忠勤報國。入登卿寺。出提元戎。

海疆徒鱷。閩嶠銷烽。奕々諸昆。蛟騰鳳起。濟々孫枝。

瑤環瑜珥。門前榮戟。堂下笙歌。淋羅象笏。巷接鳴珂。



承歡起居。太君色喜。頽惟慈訓。勤渠不已。武功既定。  
文教宜興。雅歌投壺。舉止恂恂。位極尊優。心存利濟。  
設局置醫。買田給糶。一時八閩。悉登春臺。感懷母德。  
歡頌如雷。家慶方長。天恩未艾。何意溘焉。遽歌蒿  
薤。孀星失曜。婺宿韜光。徽音不再。懿德云亡。  
天子動容。勤加賻卹。給驛傳喪。輿臺絡繹。道路環觀。  
鄉閭飲涕。禮遇交隆。榮哀兼至。嗚呼太君。夙習蓮臺。  
前身鹿苑。示現歸真。彭殤同觀。熙昔與衰。托契孔  
殷。令嗣過從。具聞德音。道路迢遙。未由持紼。哀誄送  
將。冒整萬。



祭封一品夫人張母何太君文

國運綦隆。聿生名碩。衍慶發祥。實繇內德。洪惟太君。族冠南徐。山川朗秀。韜玉涵珠。蚤奉母儀。習聞傳訓。曰嬪清河。克彰婦順。緬昔

世皇。龍飛御宇。江南初闢。賓興聲舉。時惟太翁。巍然弁冕。開國鴻文。比於謨典。掄元挂籍。拔幟春闈。聲騰蕤苑。名重容臺。發軔大行。旋持銓政。清慎公明。冰壺金鏡。衡文司豫。譽髦咸登。思皇多士。霞蔚雲蒸。維我



太君相厥終始。夙興夜寢。不愆於止。里門偕隱。白首  
相莊。詒謀式毅。惟以義方。家政親操。閨門雍肅。用啟  
後人。蘭芬桂馥。昌大之緒。鍾於相君。才華蓋代。識量  
超群。珥筆詞垣。談經講幄。一德一心。惟誠惟恪。忱恂  
篤。樂。享。於。壽。考。之。遐。昌。也。  
睿懷登庸政府。謨明弼諧。太君諄々。勗以忠藎。靖共  
爾位。勿為予諗。憶自昨歲。鑿與北征。龍沙三駕。相  
君扈行。跋履川原。凌踐霜雪。遐荒警服。邊隅寧謐。大

功告成。太君則喜。為臣如斯。不媿有子。相君純孝。念  
切萱庭。陳情省覲。肅々宵征。秘府琅函。天厨珍膳。寵  
錫駢蕃。盈朝欽羨。言歸子舍。拜母承歡。時當獻歲。椒  
酒辛盤。燕喜一堂。歡騰閭里。天恩家慶。近代無比。相  
君孺慕。繞膝牽衣。母曰勗哉。公爾忘私。星軺北還。晝  
鷁南至。子道臣忠。期於並濟。相君承志。奉以周旋。晨  
昏出入。視膳加餐。群季怡々。諸孫奕々。班衣上壽。花  
晨月夕。人生五福。罕遘其全。令德純嘏。太君有焉。僉



謂期頤。永綏天祿。忽厭塵寰。歸真返璞。嗚呼。太君式  
訓。惟儉與勤。雖膺珈翟。不異綦巾。太君治家。惟教與  
和。蘋蘩有恪。庭無譙訶。婚嫁以時。賓客如禮。嘉言懿  
行。宜載博史。何期奄忽。奪我女宗。都人掩涕。里巷停  
春。熙與太翁。南宮附尾。四十餘年。契如蘭芷。世講之  
誼。逮於相君。諸季從游。交同紀群。糠粃媿先。過蒙推  
許。綸扉共事。開誠相與。習母德音。聞母起居。歛聞華  
訃。能不歎歎。昔酒載將。蘭肴在側。跪而陳詞。庶幾歆格。

祭閣學李木庵母太夫人文

有濬惟源。有衍惟川。根蟠實茂。物理確然。猗歟盛族。  
始自文定。宗伯繼之。事業輝映。洵于黃門。繩其祖武。  
峻節高風。夔絕千古。天佑純德。篤生司空。文章經術。  
黃鐘大鏞。誰其啟之。實惟賢母。涵靈毓秀。栽培孔厚。  
溯母之先。秦邾勳裔。早嫺壺教。儀容婉孌。于歸黃門。  
溫柔懿恭。宦轍追隨。胥匡有終。治獄四明。多所寬贖。  
擢拜梧垣。風生獻替。母兮相從。夙夜贊襄。用俾黃門。



嘉猷益彰。織經組紉。服脩榛栗。必親必虔。罔勿精潔。  
滄海庚移。同心偕隱。屢聘弗起。懸車息軫。栽花蔣竹。  
左圖右書。永懷邁軸。絕意簪裾。司空髫年。岐嶷聰慧。  
實惟母氏。勤加教誨。讀書甥館。玉峯之東。鵬搏北冀。  
鳳翥南宮。振采玉堂。才名籍甚。相門有後。衣冠共慶。  
升華綸閣。旋登亞卿。龍章疊錫。惟母之榮。母曰勗  
哉。無曠厥職。克慎克勤。以繼清白。

帝眷忱恂。聿隆委任。兩浙名區。往典文柄。朝而受命。

夕惕飲水。輜軒便道。溫清寢興。母訃忽聞。驚魂飛越。  
見星而馳。入夜乃寤。嗚呼。箕疇五福。惟壽實先。母齡  
逾耄。斯推大年。詩書所稱。莫如婦德。作配黃門。恪共  
內職。承先啟後。式藉母儀。鳩鳩在桑。均平惠慈。有子  
顯庸。有孫繼起。瓜瓞綿。冒其有紀。脩然委蛇。飄乎  
若仙。養送無關。榮哀並全。惟是淑德。歛焉長往。鄉黨  
悲歎。親朋悽愴。熙與司空。共事黃扉。習聞懿行。稔悉  
芳徽。山川間之。末由執紼。蕪誅遙陳。心焉菀結。鸞軒



渺。鶴駕遲。母方不隔。庶其鑒茲。

祭適胡智修季女文

嗚呼痛哉。汝今亡矣。憶汝初生在襁褓中。性即聰慧。我甚憐惜。後以病痘幾危。幸而得生。自此在掌中膝下。蓋十五年如一日也。乙卯夏。予歸胡門。前一夕。汝拜於吾前。諄諄訓汝以敬事慈姑。善相夫子。毋驕毋怠。汝含淚答言。敢不遵父母之言。於時文貞公在堂。予引汝拜辭祖父。教云。爾自幼溫順。今為人家媳婦。不比在汝父母膝下。當小心敬慎。汝時哽咽不能



出聲。惟頰首聽命。予恐重傷老父心。即令汝歸內室。及于歸後。果能專事慈姑。敬順夫子。事上馭下。各得其宜。及至。免勉有無。以衣衽奩具。通融日用。嫁時資送。幾無復餘。汝則毫不介意。幾微不見於顏色。此雖小節。然婦人女子。最不易者。予心竊喜之。且卜汝後福之未艾也。戊午冬。予遭文貞公大故。拮据襄事。至己未。一病垂篤。汝歸省視予。時語汝事姑相夫。益當遵我訓戒。即為孝順。汝痛哭唯。孰知我旋得愈。至

今日。乃反哭汝耶。嗚呼痛哉。辛酉冬。汝壻銓除楚地。我及汝母。念汝不久遠別。時常接汝歸來。相對無言。凄然含淚者。不止一朝一夕也。每念汝壻一出都門。遷轉宦途。歸期莫卜。相會無從。中心如割。彼時私計我年將老。氣血漸衰。汝即歸來。未必得再見我也。孰意吾今乃哭汝耶。嗚呼痛哉。壬戌春正。郊外餞別。牽衣執手。父女依依。及汝登輿。我仍於輿旁。含淚語汝事姑相夫。一如在家時。汝從輿中執手。答言爹自放心。



善加保重。隨痛哭失聲。我亦悲不能止。孰憶西郊一  
別。遂成永訣。汝竟長辭家鄉。不復入都門耶。嗚呼痛  
哉。別來年餘。音書時達。今春汝壻轉官山左。應駐德  
州。相去頗近。汝母今年五十。仲冬誕日。將迎汝歸來。  
且汝壻以督押糧運。一年一度抵通。又得過家看視。  
方以為幸。故於六月望後。遣役看汝。即令隨汝壻同  
抵新任。冬初即隨汝歸寧。七月十三日。接汝壻書。知  
汝於閏六月廿三日。又生一女。我慮汝頻生女子。心

中不快。次日即於報中寄信慰問。且戒汝以產後善  
自保重。自此日夕望汝壻寄書。何時離楚。孰意七月  
廿三日。忽接汝訃音。嗚呼痛哉。我年向老。憐汝最切。  
以汝壻遠宦。晝夜思維。幸得量移近地。方幸不日可  
以見汝。而今已矣。復何望矣。嗚呼痛哉。汝壻中云。汝  
以產後風寒。七日之間。遂致不起。料汝不自意其至  
此。歿時雖有汝姑汝壻看視。想汝思及父母及弟兄  
姊妹。遠在家鄉。無一人得執手永訣。汝之悲苦。更當



何如。嗚呼痛哉。望南悲號。傷心歎絕。今於聞汝訃之  
三日。設位哭汝。渺々泉途。無分遠近。汝魂有知。尚如  
生前。依々於父母之旁。否耶。嗚呼痛哉。嗟々父母。何  
以為情。聊寫哀悰。呼而哭汝。俟汝靈輓到時。再具禮  
致祭。汝靈有知。其未享此否耶。嗚呼痛哉。

又祭季女文

嗟乎。悲哉。昨歲早春。汝壻自駕擢部僉外臺。汝隨壻奉

姑。就祿養於江楚。時余偕汝諸叔及汝兄汝弟。送汝  
於廣寧門外。汝臨別牽衣。嗚咽流涕。余亦淚下不能  
止。然猶謂女子有家。以相夫榮顯為得所。雖燕楚地  
隔音信可通。且數年後。或機緣巧合。迎汝歸寧。以圖  
歡聚。未可知也。臨岐悲發。強自抑持。情緒萬端。不能  
為狀。豈意餞送之時。遂成永別。悲哉。痛哉。汝生而明



秀。柔情和泰。妙達親心。余及汝母。晚得于子女。屢失  
之後。顧復倍加憐惜。常依懷袖。小坐膝前。承顏必笑。  
授色知心。左右旁觀。嘖嘖。嘆其聰警。年十四。于歸胡  
室。因汝舅予袞先生。與余同館。舊好。許締新盟。廟見  
後。承事君姑。相助夫子。皆能秉承家教。余心私喜。既  
而。盡出裝資。助夫從仕。良辰令序。家宴一堂。汝於珠  
璣。茵翠中。清素自甘。情無欣戚。余喜汝之心。倍於憐  
汝。竊謂閨閣少年。所見如此。其福澤或未艾也。今汝

裝在目。我念在心。獨福澤相期。遂成訛謬。豈不慟哉。  
豈不悲哉。自汝別後。去年接汝壻家信。知汝署中生  
女。欣喜平安。繡褙黃襪。馳書遺問。汝亦詳述近况。以  
慰我心。及後汝壻以急公遷。參薇省。馬首北來。糧道  
駐節安德。相隔盈一帶水。一舟可達。方圖遣使迎汝。  
而汝不能待矣。嗚呼。人世之隔。無如死生。其精神感通。  
遂成變兆。今歲夏五之夜。夢占不祥。憂疑在汝。形開  
自忖。神告非虛。思欲遣人往楚迎汝。還家一見。而汝



母念汝有身。行將就館。楚燕脩阻。不易驅馳。歎止歎行。忽如失。遷延至七月二十三日。公餘退食。宴息東齋。復夢汝掩面悲啼。云將長往。夢中衣服及容貌。宛然平昔。余執汝之手。不覺失聲驚寤。而汝家人持哀訃至矣。午影花陰。夢虛境實。余持書嘗睽。悲不能哭。真耶否耶。無以自辨。薄晚汝諸叔及汝兄汝弟。含悲慰勸。來人詳言始末。知汝真死。隄然大慟。君蒿悽愴之氣。氤氳滿前。豈汝依戀父母。魂魄不散。隨家人而來歸乎。聞汝遘疾。初尚輕微。數日便已沉篤。而遺留竟無一言以訣父母。良以汝自揣少年未必即死。所以種種苦衷。不肯即吐。既而彌留昏瞶。知將永訣。雖有所言。而氣愒聲嘶。聞者不能辨矣。此時汝姑汝壻。雖痛汝至極。猶付之無可如何。况余與汝母。相隔數千里之外耶。是抱恨終無窮期。而二老人。又何以自堪耶。又汝以弱質。早年頻仍孕育。雖坼副無害。而氣血又虛。兼以連舉數女。希望生男。所願不諧。暗懷



憂鬱遂致如此。固汝稟賦單薄。亦余福歟。德纖不能  
庇汝。天乎。人乎。苦哉。痛哉。前月下弦次日。汝母設帳  
之辰。少長咸集。兒女甥姪諸孫。莫不環繞膝前。奉觴  
稱壽。徧觀四坐。獨少汝一人。此心如碎。每接汝壻近  
信。神情恍惚。謂汝尚在。觀覽思憶。徒結深悲。汝母空  
思自咎。心摧肝剖。徒以吾老。慮過哀傷。數月以來。思  
汝念汝。語將及而輒易。淚欲下而強收。相對黯然。不  
覺其食纖而貌損也。悲哉。悲哉。汝沉冥泉路。亦有知

識。念及父母否乎。今者汝靈輜已至。窆窆有期。陳酒  
設食。以招汝魂。雖幽顯路隔。尚冀汝之來嘗。然昔人  
云。骨肉復於土。魂氣則無不之。汝其隨湘靈宓妃。棲  
息於鸚洲鄂渚之間。未可知也。或樂歸故鄉。附旌幢  
而來。亦未可知也。念汝之心。何時能已。投筆掩面。痛  
復何言。嗚呼。哀哉。



祭適李彥繩姪女文

百年幻境。天地逆旅。孰豐孰嗇。孰奪孰與。曾是淑德。乃不永延。骨肉之痛。曷禁潸然。余與汝父。少小相依。

青箱堂上。歡叙無時。憶汝初生。方在孩抱。置汝于鄰。啞然而笑。長益端重。有若成人。步趨婉婉。進止逡巡。隨父京口。忽六七載。官舍承歡。性情和藹。曰嬪君子。相國文孫。宜其室家。裕爾從後昆。奉事姑嫜。克盡誠懇。問安視膳。動遵禮法。樛木繫萼。鳩鳩在桑。寬容含



蓄德音孔臧。惟昔文貞。篤於家教。汝能遵守。不媿賢  
孝。冀汝遐齡。期汝多福。相夫通顯。詒謀式穀。何意年  
來。屢嬰疾患。時作時輟。不能少間。汝父黔西。雲山萬  
里。汝不得見。泣涕如雨。驚聞昨歲。展轉支牀。尚憐兒  
女。肝裂心傷。巫咸不靈。盧扁無術。電迅駸馳。蘭摧玉  
折。嗚呼。女子有行。皆遠父母。嗟念平生。惟汝荼苦。幼  
年失恃。焚香藐孤。長而違親。疾痛誰呼。賴汝翁姑。夙  
知大體。衣冠之家。事必由禮。汝壻青年。功名未艾。慰  
汝重泉。庶幾有在。哭汝者誰。諸父諸兄。奠汝一觴。降  
而式歆。



Large stylized seal script characters, likely a library or collection name, spanning across the gutter of the book. The characters are highly stylized and difficult to decipher without specialized knowledge of seal script.





